



BG McGaha govor

Dobro jutro vaše Ekselencije, ministri, kolege generali i poštovani gosti.

Hvala vam što ste nam se danas pridružili na svečanoj primopredaji dužnosti komandanta NATO Štaba Sarajevo.

Nakon dvije i po godine provedene u BiH, dozvolite mi da prvo iskažem duboku zahvalnost brojnim ljudima.

Admirale Munsch: Gospodine admirale, želim se zahvaliti Vama, admiralu Burkeu, generalu Cavoliju i generalmajoru Van Wagenenu na mudrosti i smjernicama koje ste mi pružali, kao i na povjerenju koje ste mi ukazali povjerivši mi da vodim ovu izuzetnu misiju.

Zahvalnost također dugujem timovima Međunarodnog osoblja NATO Sjedišta u Briselu koji su pokazali nepokolebljivu opredijeljenost Saveznika za trajni mir i sigurnost građana BiH i dokazali da NATO ne ostaje na riječima već ih provodi u djelo, kroz veću podršku i istorijski niz posjeta, uključujući generalnog sekretara, predsjedavajućeg Vojnog komiteta i Sjevernoatlantsko vijeće.

Hvala i međunarodnoj zajednici koja neumorno radi kako bi ojačala najvažnije institucije BiH.

I najvažnije, dugujem zahvalnost i pripadnicima i pripadnicama Oružanih snaga i ministarstava odbrane i sigurnosti. Vi predstavljate ono najbolje u BiH. Vaša posvećenost, profesionalizam i jedinstvo dokazuju šta se može postići kad je fokus na izgradnji bolje budućnosti. Tome svjedoče vaši rezultati u certifikaciji Bataljonske grupe lake pješadije po međunarodnim standardima – unaprijed se radujemo danu kada će cijele Oružane snage BiH biti obučene, opremljene i imati smještaj u skladu s NATO standardima.

Na kraju, ali ni slučajno manje važno, zahvale idu mom stručnom timu u NATO Štabu Sarajevo koji mi je pružao tako kompetentnu podršku. Naše dvadesetogodišnje partnerstvo s BiH rezultat je vaše službe i požrtvovanosti. Puno dugujem vama i vašim porodicama.

Hvala vam.

Tokom protekle dvije godine, dosta toga smo zajedno postigli.

Produbili smo veze između BiH i naših država – uz povećanu podršku koja će institucijama BiH pomoći da ojačaju svoju otpornost na savremene sigurnosne izazove, uključujući terorizam, cyber napade, prirodne katastrofe i maligne uticaje.

Pomogli smo da BiH bude sigurnija, uz združene napore EU, OSCE-a i velikog broja ambasada, tako što smo podržali sporazum koji će pomoći da se ubrza proces rješavanja viškova municije i eksploziva, te omogućiti pražnjenje neperspektivnih lokacija za potrebe primopredaje.

**NATO Headquarters Sarajevo**
NHQSA TALKING POINTS

Bosnia and Herzegovina



Zajedno s organizacijama poput UN-a, Agencije za ravnopravnost spolova BiH, Granične policije i policijskih snaga, kao i Ministarstva odbrane i Oružanih snaga, naglasili smo značaj žena koje rade u bilo kom svojstvu u oblastima odbrane, sigurnosti i diplomatije, kako bismo postigli konkurentnost zasnovanu na zaslugama, te učvrstili uvjerenje da ravnopravnost spolova nije pitanje „ženskih prava“ već sigurnosni imperativ.

Uz neprocjenjivu podršku Ambasade Norveške – NATO kontakt ambasade, te brojnih ambasadora iz zemalja članica Saveza, promovirali smo trajne vrijednosti našeg Saveza i podigli na viši nivo debatu o pitanjima koja jačaju našu kolektivnu sigurnost i način života.

Poruka za brigadnog generala Valasa: Matt, u vojsci nema puno uloga poput ove. Sigurna sam da će tvoja perspektiva pomoći u unapređenju našeg partnerstva sa ovom predivnom zemljom. Uvjeravam te da si na početku dvije najispunjenije godine u svojoj karijeri.

Vidjet ćeš po broju prisutnih ovdje danas da imamo mnogo prijatelja u Bosni i Hercegovini.

Prijatelja koji dijele viziju NATO-a o sigurnijem svijetu za sve, gdje se poštuju suverenitet, teritorijalni integritet i međunarodno pravo, i gdje je svaka država slobodna da bira svoj vlastiti put.

Prijatelja koji razumiju da snažne državne institucije osiguravaju mir. I da su Oružane snage BiH ključne za stabilnost u regionu, dok istovremeno mladim ljudima pružaju prilike za zapošljavanje i obuku u zemlji.

Prijatelja koji s nama dijele posvećenost pomaganju BiH kako bi imala bolju budućnost koju dokazano donose euroatlantske integracije.

Rečeno je da je Bosna i Hercegovina mjesto „gdje je gostoprimstvo način života i gdje ljepota leži u raznolikosti njenih pejzaža i ljudi“. To je emocija za koju ja sigurno mogu reći da je istinita. BiH je ostavila trag na meni tokom prvog boravka u regionu, a sada, uz novostečena prijateljstva, imam mnogo više razloga da se vratim.

Još jednom hvala za ovako toplu dobrodošlicu u BiH i za izuzetnu privilegiju da budem na čelu ove misije i da radim zajedno sa svima vama.